

En pia memoria da Giulia Huonder, Sumvitg/Sedrun



Enqualga audan ins glieud che dian, els lessien il pli bugen murir durant la lavur. La casarina dil plevon da Sumvitg, la Giulia Huonder, ha giu quella sort da vegnir clamada dil Segner ordmiez la lavur. Sco mintgadi aveva ella era quei di, il venderdis, ils 25 d'avrel, semtgau igl ensolver al sur frar, aveva fatg las lavurs dalla damaun en casa e fuva lu ida en iert per cultivar e semnar cun la speranza da d'atun era saver raccoltar. Era cheu severifichescha il plaid da sogn Paul, auters eis ei che semnan, auters che raccoltan. Amiez la lavur vegn ella tuccada dalla daguota. Vischinas han

observau ella en iert giun plaun, han bein spert clamau il sur frar che fuva en scola a dar ductrina. Il miedi ch'ins ha clamau ha stuiu constatar la daguota dil tschurvi. — Transportada el spital a Glion, eis ella spartida leu ils 30 d'avrel.

Survir ei stau il cuntegn dalla veta dalla defuncta, 37 onns ha ella en tgeuadad e fideivladad fatg il percas en casa pervenda da siu frar sur Placi: 1937—44 a Morissen, 1944—61 a Sursaiassa ed 1961—75 a Sumvitg. Meinsvart audan ins glieud che manegian ch'ina casarina d'in augsegner hagi bi. Tals fan in sbagl, sch'ei crein ch'ina casarina d'in augsegner hagi mo bi e patratgan buca ch'ei dat tier il survetsch en casa pervenda bia grev e che quei survetsch ei unius cun buca pintga responsabladad. Ina casarina en ina casa pervenda ei bia persula; ella sto saver star persula; ella sto saver salvar per sesezza tut quei che va en ed ord casa, ella sto saver disponer tier visetas prevedidas e nunprevididas. Adina sto ella haver semtgau il necessari. Clamada drova ei per in tal survetsch.

La Giulia ha giu quella clamada; ella ha durant biars onns prestau fideivel survetsch da casarina en casa pervenda da siu frar. Tgeu sco ella ei vivida ed ha surviu, aschia eis ella morta. Ils biars augsegners, che fuvan presents alla sepultura, han cheutras vuliu exprimer lur renconuschientscha e lur engraziament alla Giulia per il bien survetsch prestau a siu frar sur Placi ed a ses confrars che vegnevan bugen inaga ni l'autra sin viseta en casa pervenda a Sumvitg. Il grond diember da casarinas d'augsegners, che fuvan vegnidadas tier la sepultura, ha mussau che la Giulia era beinvesida e stimada en l'unien dallas casarinas. Aunc tier la davosa radunonza ch'ellas hagian giu, fuvi la Giulia legra e da buna veglia. Ils 2 da matg, il venderdis dil Ss. Cor da Jesus, ha in grond til da bara accumpignau la defuncta alla fossa sil santeri a Sedrun.

A Sedrun fuva ella naschida 1907, leu ha ella passantau ils onns da giuventetgna. Sil santeri a Sedrun spetga ella cun ses geniturs Placi Sigisbert e Margheta Castgina, naschida Schmid, sin la levada pascala. Il Segner detti alla fideivla survien-
ta Giulia Huonder la pagaglia perpetua. tb

† Vigeli e Valentin Berther, Sedrun

(Corr.) Ei succeda buca savens, che dus defuncts vegnan satrai il medem di. Denton che gest dus frars han sepultura comunabla ei aunc ina pli gronda raritad. Aschia pressapauc ei Sur Durschei s'exprimius en siu riug da bara per ils dus fargliuns.

Il Vigeli ha saviu festivar ils 10 da settember siu 85avel onn en cumpleina sanadad. Negin vess sminau, ch'el stoppi suttacumber schi spert ad ina grippa. Ei sedi denton, ch'ins mieri sco ins vivi: Il Vigeli ei staus in um da siu fatg, ha luvrau e barhau sco pur per sia numerosa famiglia senza curdar si ni vuler esser en peis ad enzatgi. Siu giavisch da buca dar mulesta ad enzatgi alla fin da sia veta, ei ius en vigur. Sper sia humiliteivladad sedistingueva il defunct era entras religiosadad e buontad. Ins steva bugen entuorn il Vigeli. Grazia a sia gronda memoria saveva el raquintar interessantas caussas da pli baul. Bugen raschunava el da sias aventuras sco starler pign ell'alp da stiafls a Curnera. Nus apprezzavan era il defunct muort siu humor schetg. Mintgaton vev'el era tschaffien da dar ina strieda — secapescha senza malart.

Il Valentin ei diesch onns pli giuvens. Era el ei vegnius sin ina biala vegliadetgna, malgrad ch'ins ha temiu per el l'entschatta, ha el gie retschiert il batten da dunnauns. A caschun da siu giubileum da 75 onns gl'onn vargau eis ei vegniu seregurdau dad el en quei liug (GR, nr.

8). Nus lein buca repeter quei ch'ei vegniu scret leu. Il Valentin ha fatg cun tschaffien ed anim il pur ed ei staus in bien bab e vischin. Special tschaffien vev'el dil cant: El ei staus tochen sia mort commember dil chor baselgia e dil chor mischedau, ils quals han priu comiau da lur fideivel e bien camerat entras ina canzun. Ina gronda crusch per el e sia famiglia ei la mort da dus fegls ella flur dalla veta stada. Ils davos onns ha il defunct giu da far empau culla sanadad. La finala eis el morts el spital da Glion suenter grondas suffrientschas. Cumparegliau cun lur geniturs han ils defuncts cuntunschiu ina biala vegliadetgna. Mo prender comiau dad in bien bab e vischin va vess. Sperond sin seveser ei la separaziun denton pli leva! Allas familias en malencurada nossa profunda condolientscha!